



## Kerajaan sasar lahirkan 125,000 hufaz profesional menjelang 2050

Oleh Rosman Shamsudin - Februari 19, 2023 @ 6:28pm  
bhnews@bh.com.my

TANJUNG MALIM: Kerajaan menasarkan melahirkan 125,000 hufaz profesional di seluruh negara menjelang tahun 2050.

Timbalan Perdana Menteri, Datuk Seri Dr Ahmad Zahid Hamidi, berkata ke arah itu, beliau memberi tempoh selama dua minggu kepada Universiti Pendidikan Sultan Idris (UPSI) mempersiapkan modul dan pedagogi pengajaran dan pembelajaran untuk pelajar serta tenaga pelajar.

"UPSI juga telah mengambil langkah ke hadapan bersama Gabungan Persatuan Institut Tahfiz al-Quran Kebangsaan (PINTA) dalam menyediakan modul pengajian untuk hufaz bagi perlaksanaan program jangka pendek di peringkat sijil, diploma dan ijazah.

"UPSI juga berhasrat mewujudkan sebuah institusi pengajian dan pendidikan Islam secara khusus kepada hufaz di seluruh negara bagi merealisasikan hasrat kerajaan," katanya.

Beliau berkata demikian sempena Lawatan Khas ke UPSI di Dewan Konvensyen Bangunan E-Learning Kampus Sultan Abdul Jalil Shah, hari ini.

Yang turut hadir, Pengurus Lembaga Pengarah UPSI, Datuk Seri Rohani Parkash Abdullah; Naib Cancellor UPSI, Prof Datuk Dr Md Amin Md Taff dan Presiden PINTA, Mohd Zahid Mahmood.

Ahmad Zahid yang juga Menteri Kemajuan Desa dan Wilayah (KKDW) berkata, ini adalah satu program jangka panjang, namun perlu dimulakan dengan program jangka pendek iaitu di peringkat persijilan, diploma dan ijazah.

Katanya, UPSI tentunya juga akan merangka supaya kursus atau pengajian lanjutan di peringkat sarjana dan doktor falsafah juga dipersiapkan bagi melahirkan hufaz terbabit.

"Erfinya mereka bukan hanya menjadi ahli-ahli profesional seperti jurutera, peguam, doktor, akauntan dan sebagainya, tetapi pada waktu yang sama mereka juga terus boleh menjadi imam masjid dan mengetuai beberapa institusi atau pun badan-badan korporat.

Ahmad Zahid berkata, pengambilan pelajar yang memasuki Maktab Rendah Sains MARA (MRSRM) yang akan mengikuti kursus Pendidikan Latihan Teknikal dan Latihan Vokasional (TVET) di seluruh negara khususnya, yang yang diletakkan di bawah KKDW juga akan menggunakan modul UPSI dan PINTAR.

Katanya, modul terbabit juga bakal digunakan untuk melatih guru termasuk pemaju masyarakat di TADIKA dan Tabika KEMAS, MRSRM, dan pelajar institusi TVET di bawah kementeriannya.